

七十二家集

魏文帝集卷之四

魏文帝曹丕子桓著

詔

下潁川詔

潁川先帝所由起兵征伐也官渡之役四方瓦解遠近顧望而此郡守義丁壯荷戈老弱負糧昔漢祖以秦中爲國本光武恃河內爲王基今朕復於此登壇受禪天以此郡翼成大魏

增封中牟侯彰詔

先王之道庸勲親親竝建母弟開國承家故能  
藩屏大宗禦侮厭難彰勲受命北伐清定朔土  
厥功茂焉增邑五千

答臨淄侯植詔

植表欲祭先王操於北河之上博士鹿  
優韓益等以爲禮公子不得稱先君公  
子之子不得祖諸侯謂不得立廟而祭  
也禮又曰庶子不得祭宗廟遂詔答之

得月二十八日表知侯推情欲祭先王於河上  
覽省上下悲傷感切將欲遣禮以紓侯敬恭之  
意會博士鹿優等奏禮如此故寫以示開國承  
家顧迫禮制惟侯存心與吾同之

答北海王褒詔

黃初三年黃龍見鄴西滻水褒  
上書贊誦賜黃金十斤詔答

昔唐叔歸禾東平獻頌斯皆骨肉贊美以彰懿  
親王研精墳典耽味道真文雅煥炳朕甚嘉之  
王其克慎明德以終令問

待楊彪客禮詔

夫先王制几杖之賜所以賓禮黃耆褒崇元老也昔孔光卓茂皆以淑德高年受茲嘉賜公故漢宰臣乃祖已來世著名節年過七十行不踰矩可謂老成人矣所宜寵異以章舊德其賜公延年杖及馮几謁請之日便使杖入又可使著鹿皮冠

賜華歆詔

司徒國之倚老所與和陰陽理庶事也今大官  
重膳而司徒蔬食甚無謂也特賜御衣及爲其  
妻子男女皆作衣服

論孫權詔

權前對浩周自陳不敢自遠樂委質長爲外臣  
又前後辭言頭尾擊地此鼠子自知不能保爾  
許地也又今與周書請以十二月遣子復欲遣  
孫長緒張子布隨子俱來彼二人皆權股肱心  
腹也又欲爲子於京師求婦此權無異心之明  
效也

孫權與浩周書附

昔君之來欲令遣子入侍于時傾心歡以承



命徒以登年幼欲假年歲之間耳而赤情未  
蒙昭信遂見討責常用慙怖自頃國恩復加  
開導忘其前愆取其後效喜得因此尋覓本  
誓前已有表具說遣子之意思想君假還已知  
之也

又

今子當入侍而未有妃耦昔君念之以爲可  
上連綴宗室若夏侯氏雖中間自棄常奉戢  
在心當垂宿念爲之先後使獲攀龍附驥未

自固定其爲分惠豈有量哉如是欲遣孫長緒與小兒俱入奉行禮聘成之在君

又

小兒年弱加教訓不足念當與別爲之緬然父子恩情豈有已邪又欲遣張子布追輔護之孤性無餘凡所欲爲今盡宣露惟恐赤心不先暢達是以具爲君說之宜明所以

以陳群爲鎮軍司馬懿爲撫軍詔

昔軒轅建四面之號周武稱予有亂臣十人斯  
蓋先聖所以體國君民亮成天工多賢爲貴也  
今內有公卿以鎮京師外設牧伯以監四方至  
於元戎出征則軍中宜有柱石之賢帥輜重所  
在又宜有鎮守之重臣然後車駕可以周行天  
下無內外之慮吾今當征賊欲守之積年其以  
尚書令潁鄉侯陳群爲鎮軍大將軍尚書僕射  
西鄉侯司馬懿爲撫軍大將軍若吾臨江授諸

將方略則撫軍當留許昌督後諸軍錄後臺文  
書事鎮軍隨車駕當董督衆軍錄行尚書事皆  
假節鼓吹給中軍兵騎六百人吾欲去江數里  
築宮室往來其中見賊可擊之形便出奇兵擊  
之若或未可則當舒六軍以遊獵饗賜軍士

詔王朗等三公

孫權欲遣子登入侍不至是時車駕從許昌大興屯田欲舉軍東征朗上疏諫帝以疾軍遂行臨江而還詔王朗等三公

三世爲將道家所忌窮兵黷武古有成戒况連年水旱士民捐耗而功作倍於前勞役兼於昔進不滅賊還不和民夫屋漏在上知之在下然迷而知反失道不遠過而能改謂之不過今將休息棲備高山沈權九淵割除擯棄投之畫外車駕當以今月中旬到譙淮漢衆軍亦各還反

不臘西歸矣

與王朗詔

黃初中詔丞相魏延爲行君子所薦光祿大夫楊彪且稱在讓位以建奇乃爲彪置吏卒位次三公詔朗朗乃起

朕求賢於君而未得君乃翻然稱疾非徒不得賢更聞失賢之路增玉鉉之傾無乃居其室出其言不善見違於君子乎君其勿有後辭

報王朗詔

朗爲司空帝頗出涕淚或昏夜還宮朗上疏帝悲之

覽表雖魏絳稱虞箴以諷聖懷相如陳猛獸以  
戒漢武未足以喻方今二寇未殄將帥遠征故  
時入原野以習戎備至於夜還之戒已詔有司  
施行



答蔣濟詔

文帝卽王位轉濟爲相國長史及踐阼出爲東中郎將濟請留詔曰

高祖歌曰安得猛士守四方天下未寧要湏良臣以鎮邊境如其無事乃還鳴玉未爲後也

與夏侯尚詔

文帝詔尚尚以示散騎常侍蔣濟濟言  
於帝曰作威作福書之明誠天子無戲  
言古人所慎於  
是追赦前詔

卿腹心重將特當任使恩施足死惠愛可懷作  
威作福殺人活人

報何夔詔

蓋禮賢親舊帝王之常務也以親則君有輔弼  
之勲焉以賢則君有醇固之成焉夫有陰德者  
必有陽報今君疾雖未瘳神明聽之矣君其卽  
安以順朕意

與于禁詔

昔漢高脫衣以衣韓信光武解綬以帶李忠誠  
皆人主當時貴敬功勞今以遠遊冠與將軍

于禁復官詔

昔荀林父敗績於邲孟明喪師於轂秦晉不替  
使復其位其後晉獲狄土秦霸西戎區區小國  
猶尚藉斯而况萬乘乎樊城之敗水災暴至非  
戰之咎其復禁等官

追贈夏侯尚詔

尚自少侍從盡誠竭節雖云異姓其猶骨肉是以入爲腹心出當爪牙智畧深敏謀謨過人不幸早殞命也奈何贈征南大將軍昌陵侯印綬

封朱靈郇侯詔

將軍佐命先帝典兵歷年威過方邵功踰絳灌  
圖籍所美何以加焉朕受天命帝有海內元功  
之將社稷之臣皆朕所與同福共慶傳之無窮  
者也今封郇侯富貴不歸故鄉如夜行衣繡若  
平常所志願勿難言

與張邵詔

邵雖武將而愛樂儒士嘗薦同鄉  
畢湛明經行脩詔以湛爲博士

昔祭遵爲將奏置五經大夫居軍中與諸生雅  
歌投壺今將軍外勒戎旅內存國朝朕嘉將軍  
之意今擢湛爲博士



# 答孟達詔

王雄爲西郿從事與達同僚及爲涿郡太守達表薦之詔報達雄後歷幽州刺史

昔蕭何薦韓信鄧禹進吳漢惟賢知賢也雄有  
膽智技能文武之姿吾宿知之今便以叅散騎  
之選方使少在吾門下知指歸便大用之矣天  
下之士欲使皆先歷散騎然後出據州郡是吾  
本意也

手報司馬芝詔

芝爲河南尹曹洪乳母與臨汾公主侍  
者共祝無間神繫獄卞太后遣黃門傳  
令芝不通輒勅洛陽獄考  
竟芝上疏謝罪帝報之

省表明卿至心欲奉詔書以權行事是也此乃  
卿奉詔之意何謝之有後黃門復往慎勿通也

封張遼李典子爲關內侯詔

合肥之役遼典以步卒八百破賊十萬自古用  
兵未之有也使賊至今奪氣可謂國之爪牙矣  
其分遼典邑各百戶賜一子爵關內侯

以李通子基爲中郎將詔

昔袁紹之難自許蔡以南人懷異心通秉義不  
顧使攜貳率服朕甚嘉之不幸早薨子基雖已  
襲爵未足酬其庸勲基兄緒前屯樊城又有功  
世篤其勞其以基爲奉義中郎將緒平虜中郎  
將以寵異焉

賜張旣子翁歸焉關內侯詔

昔荀桓子立勲翟土晉侯賞以千室之邑馮異  
輸力漢朝光武封其二子故涼州刺史張旣能  
容民畜衆使群羌歸土可謂國之良臣不幸薨  
隕朕甚愍之其賜小子翁歸爵關內侯

賜溫恢子生爵關內侯詔

恢有柱石之質服事先帝功勤明著及爲朕執  
事忠於王室故授之以萬里之任任之以一方  
之事如何不遂吾甚愍之賜恢子生爵關內侯

以張登爲大官令詔

登忠義彰著在職功勤名懋雖卑直亮宜顯褒  
膳近任當得此吏今以登爲大官令

魏文帝集卷之五

魏文帝曹丕子桓著

令

向化手令

蜀將孟達率衆降武都氏王  
率種人內附王自手筆作令

吾前遣使宣國威靈而達卽來吾惟春秋褒儀  
父卽封拜達使還領新城太守近復有扶老携  
幼首向王化者吾聞夙沙之民自縛其君以歸  
神農豳國之衆襁負其子而入豐鎬斯豈驅略



迫脅之所致哉乃風化動其情而仁義感其衷  
歡心內發使之然也以此而推西南將萬里無  
外權備將與誰守死乎

答許芝上代漢圖誠令

昔周文三分天下有其二以服事殷仲尼歎去  
至德公旦履天子之籍聽天下之斷終然後子  
明辟書美其人吾雖德不及二聖敢忘高山景  
行之義哉若夫唐堯舜禹之蹟皆以聖質茂德  
處之故能上和靈祇下寧萬姓流稱今日今吾  
德至薄也人至鄙也遭遇際會幸承先王餘業  
恩未被四海澤未及天下雖傾倉竭府以振魏  
國百姓猶寒者未盡煖饑者未盡飽夙夜憂懼

弗敢違寧庶欲保全髮齒長守今日以沒于地  
以全魏國下見先王以塞負荷之責望狹志局  
守此而已雖屢蒙祥瑞當之戰惶五色無主若  
芝之言豈所聞乎心慄手悼書不成字辭不宣  
口吾間作詩曰喪亂悠悠過紀白骨縱橫萬里  
哀哀下民靡恃吾將佐時整理復子明辟致仕  
庶欲守此辭以自終卒不虛言也宜宣示遠近  
使昭赤心

太史丞許芝上代漢圖讖附

易傳曰聖人受命而王黃龍以戊巳日見七月四日戊寅黃龍見此帝王受命之符瑞最著明者也又曰初六履霜陰始凝也又有積蟲大亢天子之宮厥咎然今蝗蟲見應之也又曰聖人以德親比天下仁恩洽普厥應麒麟以戊巳日至厥應聖人受命又曰聖人清淨行中正賢人福至民從命厥應麒麟來春秋漢合華曰漢以魏魏以徵春秋玉版誡曰代赤眉者魏公子春秋佐助期曰漢以許昌

失天下故白馬令李雲上事曰許昌氣見於  
當塗高當塗高者當昌於許當塗高者魏也  
象魏者兩觀闕是也當道而高大者魏魏當  
代漢今魏基昌於許漢微絕於許乃今効見  
如李雲之言許昌相應也佐助期文曰漢以  
蒙孫亡說者以蒙孫漢二十四帝童蒙愚昏  
以弱亡或以雜文爲蒙其孫當失天下以爲  
漢帝非正嗣少時爲董侯名不正蒙亂之荒  
惑其子孫以弱亡孝經中黃誡曰日載東絕

火光不橫 聖聰明四百之外易姓而王天  
下歸功致太平居八甲共禮樂正萬民嘉樂  
家和難此魏王之姓諱著見圖讖易運期讖  
曰言居東西有午兩日竝光日居下其爲主  
反爲輔五八四十黃氣受真人出言許字兩  
日昌字漢當以許亡魏當以許昌今際會之  
期在許是其大效也易運期又曰鬼在山禾  
女連王天下臣聞帝王者五行之精易姓之  
符代興之會以七百二十年爲一軌有德者

過之至於八百無德者不及至四百載是以  
周家八百六十七年夏家四百數十年漢行  
夏正訖今四百二十二歲又高祖受命數雖  
起乙未然其兆徵始於獲麟獲麟以來七百  
餘年天之歷數將以盡終帝王之興不常一  
姓太微中黃帝坐常明而赤帝坐常不見以  
爲黃家興而赤家衰凶亡之漸自是以來四  
十餘年又熒惑失色不明十有餘年建安十  
年彗星先除紫微二十三年復掃太微新天

子氣見東南以來二十三年白虹貫日月蝕  
熒惑比年巳亥壬子丙午日蝕皆水滅火之  
象也殿下卽位初踐阼德配天地行合神明  
恩澤盈溢廣被四表格于上下是以黃龍數  
見鳳皇仍翔麒麟皆臻白虎效仁前後獻見  
於郊甸甘露醴泉奇獸神物衆瑞竝出斯皆  
帝王受命易姓之符也昔黃帝受命風后受  
河圖舜禹有天下鳳皇翔浴出書湯之王白  
鳥爲符文王爲西伯赤鳥銜丹書武王伐殷



白魚升舟高祖始起白蛇爲徵巨跡瑞應皆  
爲聖人興觀漢前後之大災今茲之符瑞察  
圖讖之期運揆河洛之所甄未若今大魏之  
最美也夫得歲星者道始興昔武王伐殷歲  
在鶉火有周之分野也高祖入秦五星聚東  
井有漢之分野也今茲歲星在大梁有魏之  
分野也而天之瑞應並集來臻四方歸附襁  
負而至兆民欣戴咸樂嘉慶春秋大傳曰周  
公何以不之魯蓋以焉雖有繼體守文之君

不害聖人受命而王周公反政尸子以爲孔子非之以爲周公不聖不爲兆民也京房作易傳曰凡爲王者惡者去之弱者奪之易姓改代天命應常人謀鬼謀百姓與能伏惟殿下體堯舜之盛明膺七百之禪代當湯武之期運值天命之移受河洛所表圖讖所載昭然明白天下學士所共見也臣職在史官考符察徵圖讖效見際會之期謹以上聞

答辛毗等令

下四方以明孤款心是也至於覽餘辭豈余所  
謂哉寧所堪哉諸卿指論未若孤自料之審也  
夫虛談謬稱鄙薄所弗當也且聞比來東征經  
郡縣歷屯田百姓面有饑色衣或短褐不完罪  
皆在孤是以上慙衆瑞下愧士民由斯言之德  
尚未堪偏王何言帝者也宜止息此議無重吾  
不德使逝之後不愧後之君子

侍中辛毗等上書論圖讖附

伏見太史丞許芝上魏國受命之符令書懇切允執謙讓雖舜禹湯文義無以過然古先哲王所以受天命而不辭者誠急遵皇天之意副兆民之望弗得已也且易曰觀乎天文以察時變觀乎人文以化成天下又曰天垂象見吉凶聖人則之河出圖洛出書聖人效之以爲天文因人而變至於河洛之書著於洪範則殷周效而用之矣斯言誠帝王之明符天道之大要也是以由德應錄者代興於

前失道數盡者迭廢於後傳譏裴弘欲文天  
之所壞而說蔡墨雷乘乾之說明神器之存  
亡非人力所能建也今漢室衰替帝綱墜墜  
天子之詔歇滅無聞皇天將捨舊而命新百  
姓旣去漢而爲魏昭然著明是可知也先王  
撥亂平世將建洪基至於殿下以至德當歷  
數之運卽位以來天應人事粲然大備神靈  
圖籍兼仍往古休徵嘉兆跨越前代是芝所  
取中黃運期姓諱之識斯文乃著於前世與

漢竝見由是言之天命久矣非殿下所得而  
拒之也神明之意候望禋享兆民顙顙咸注  
嘉願惟陛下覽圖籍之明文急天下之公義  
輒宣令外內布告州郡使知符命著明而殿  
下謙虛之意

答司馬懿等令

世之所不足者道義也所有餘者苟妄也常人之性賤所不足貴所有餘故曰不患無位患所以立孤雖寡德庶自免於常人之貴夫石可破而不可奪堅丹可磨而不可奪赤丹石微物尚保斯質况吾託士人之末列曾受教於君子哉且於陵仲子以仁爲富栢城子高以義爲貴鮑焦感子貢之言棄其蔬而槁死薪者譏季札失辭皆委重而弗視吾獨何人昔周武大聖也使

叔旦盟膠鬲於四內使召公約微子於共頭故  
伯夷叔齊相與笑之曰昔神農氏之有天下不  
以人之壞自成不以人之卑自高以爲周之伐  
殷以恭也吾德非周武而義慙夷齊朕欲遠苟  
妄之失道立丹石之不奪邁於陵之所富蟠栢  
威之所貴執鮑焦之貞至遵新者之清節故曰  
三軍可奪帥匹夫不可奪志吾之斯志豈可奪  
哉

司馬懿等上書論圖讖附



伏讀太史丞許芝上符命事臣等聞有序世  
衰天命在虞虞氏世衰天命在夏然則天地  
之靈歷數之運去就之符惟德所在故孔子  
曰鳳鳥不至河不出圖吾已矣夫今漢室衰  
自安和冲質以來國統屢絕桓靈荒淫祿去  
公室此乃天命去就非一朝一夕其所由來  
久矣殿下踐阼至德廣被格于上下天人感  
應符瑞竝臻考之舊史未有若今日之盛夫  
大人者先天而天弗違後天而奉天時天時

已至而猶謙讓者舜禹所不爲也故生民蒙  
救濟之惠群類受育長之施今八方顛隕大  
小注望皇天乃眷神人同謀十分而九以委  
賈義過周文所謂過恭也臣妾上下伏所不  
安

答劉廙劉曄等令

翠牛之駭似虎莠之似似禾事有似是而非者  
今日是已覩斯言事良重吾不德于是尚書僕  
射宣告官寮咸使聞知

劉廙劉曄等上言圖讖附

臣伏讀左中郎將李伏上事考圖緯之言以  
效神明之應稽之古代未有不然者也故堯  
稱歷數在躬璇璣以明天道周武未戰而赤  
烏銜書漢祖未兆而神母告符孝宣仄微宇

成木葉光武布衣名已勒識是天之所命已  
著聖哲非有言語之聲芬芳之臭可得而知  
也徒縣象以示人徵物以效意耳自漢德之  
衰漸染數世桓靈之末皇極不建暨于大亂  
二十餘年天之不泯誕生明聖以濟其難是  
以符讖先著以彰至德殿下踐阼未基而靈  
象變于上群瑞應于下四方不羈之民歸心  
向義唯懼在後雖典籍所傳未若今之盛也  
臣妾遠近莫不鳧藻

左中郎將李伏陳符瑞表附

昔先王初建魏國在境外者聞之未審皆以  
爲拜王武都李庶姜合羈旅漢中謂臣曰必  
爲魏公未便王也定天下者魏公子桓神之  
所命當合符讖以應天人之位臣以合辭語  
鎮南將軍張魯魯亦問合知書所出合曰孔  
子玉版也天子歷數雖百世可知是後月餘  
有亡人來寫得冊文卒如合辭合長於內學  
關右知名魯雖有懷國之心沈溺異道變化

不果寤令之言後密與臣議策質國人不協  
或欲西通魯卽怒曰寧爲魏公奴不爲劉備  
上客也言發惻痛誠有由然合先迎王師往  
歲病亡於鄴自臣在朝每爲所親宣說此意  
時未有宣弗敢顯言殿下卽位初年禎祥衆  
瑞日月而至有命自天昭然著見然聖德洞  
達符表豫明實乾坤挺慶萬國作孚臣每慶  
賀欲言合驗事君盡禮人以爲譎况臣名行  
穢賤入朝日淺言爲罪尤自抑而已今洪澤

被四表靈恩格天地海內翕習殊方歸服兆  
應竝集以揚休命始終允臧臣不勝喜舞謹  
具表通

讓禪令

當奉還璽綬爲讓章吾豈奉此詔承此貺邪昔  
堯讓天下於許由子州支甫舜亦讓于善卷石  
戶之農北人無擇或退而耕潁之陽或辭以幽  
憂之疾或遠入山林莫知其處或攜子入海終  
身不反或以爲辱自投深淵且顏歆懼太僕之  
不完守知足之明分王子搜樂丹穴之潛處被  
重而不出柳下惠不以三公之貴易其介魯參  
不以晉楚之富易其仁斯九士者咸高節而尚



義輕富而賤貴故書名千載于今稱焉求仁得  
仁仁豈在遠孤獨何爲不如哉義有蹈東海而  
逝不奉漢朝之詔也亟爲上章還璽綬宣之天  
下使咸聞焉

清苑侯劉若等上書勸進附

伏讀令書深執克讓聖意懇惻至誠外昭臣  
等有所不安何者石戶北人匹夫狂狷行不  
合義事不經見者是以史遷謂之不然誠非  
聖明所當希慕且有虞不逆放勛之禪夏禹

亦無辭位之語故傳曰舜陟帝位若固有之  
斯誠聖人知天命不可逆歷數弗可辭也伏  
惟陛下應乾符運至德發聞升昭于天是三  
靈降瑞人神以和休徵雜沓萬國響應雖欲  
勿用將焉避之而固執謙虛違天逆衆慕匹  
夫之微分背上聖之所蹈違經識之明文信  
百氏之穿鑿非所以奉答天命光慰衆望也  
臣等昧死以請輒整頓壇場至吉日受命如  
前奏分別寫令宣下

讓禪第二令

昔柏成子高辭夏禹而匿野顏闔辭魯幣而遠  
跡夫以王者之重諸侯之貴而二子忽之何則  
其節高也故烈士徇榮名義夫高貞介雖蔬食  
瓢飲樂在其中是以仲尼師王駟而子產嘉申  
徒今諸卿皆孤股肱腹心足以明孤而今咸若  
斯則諸卿遊于形骸之內而孤求爲形骸之外  
其不相知未足多怪亟爲上章還璽綬勿復紛  
紛也

輔國將軍等勸進附

臣聞符命不虛見衆心不可違故孔子曰周公其爲不聖乎以天下讓是天地日月輕去萬物也是以舜嚮天下不拜而受命今火德氣盡炎上數終帝遷明德祚隆大魏符瑞昭哲受命旣固光天之下神人同應雖有虞儀鳳成周躍魚方今之事未足以喻而陛下違天命以飾小行逆人心以守私志上忤皇穹眷命之旨中忘聖人達節之數下孤人臣翹

首之望非所以揚聖道之高衢乘無窮之勲  
勲也臣等聞事君有獻可替否之道奉上  
有  
逆鱗固爭之義臣等敢以死請

讓禪第三令

夫古聖王之治也至德合乾坤惠澤均造化禮  
教優乎昆蟲仁恩洽乎草木日月所照戴天履  
地含氣有生之類靡不被服清風沐浴玄德是  
以金革不起苛慝不作風雨應節禎祥觸類而  
見今百姓寒者未煖饑者未飽鰥者未室寡者  
未嫁權備尚存未可舞以干戚方將整以齊斧  
戎役未息於外士民未安於內耳未聞康哉之  
歌目未覩繫壤之戲嬰兒未可託於高巢餘糧

未可以宿於田畝人事未備至於此也夜未曜  
景星治未通真人河未出良馬山未出象車冀  
焚木植階庭楚莆未生庖厨王母未獻白環渠  
搜未見珍裘靈瑞未效又如彼也昔東戶季子  
容成大庭軒轅赫胥之君咸得以此就功勒名  
今諸卿獨不可少假孤精心竭慮以和天人以  
格至理使彼衆事備群瑞效然後安乃議此乎  
何遽相愧相迫之如是也速爲讓章上還璽綬  
無重吾不德也